

# REGLUR nr. 650/2007

## um almennt og sérstakt hæfi löggiltra vigtarmanna, með áorðnum breytingum, sbr. auglýsingu nr. 20/2008.\*

Tóku gildi 17. júlí 2007. Breytt með auglýsingu nr. 20/2008 (tók gildi 16. janúar 2008).

### 1. gr.

#### *Gildissvið.*

Ákvæði þessara reglna gilda um starfshætti löggiltra vigtarmanna sem gefa út fullgild vottorð í samræmi við ákvæði VII. kafla laga nr. 91/2006 um mælingar, mæligrunna og vigtarmenn.

### 2. gr.

#### *Almenn hæfisskilyrði.*

Löggiltir vigtarmenn geta þeir orðið sem uppfylla eftirtalin skilyrði:

- a. eru búsettir hér á landi,
  - b. eru fullra tuttugu ára,
  - c. eru sjálfráða og fjárráða,
  - d. hafa sótt námskeið til löggildingar vigtarmanna og staðist próf.
- Synja skal manni um löggildinguna ef 68. gr. almennra hegningarlaga á við um hagi hans.

### 3. gr.

#### *Almenn neikvæð hæfisskilyrði.*

Löggiltur vigtarmaður skal ekki taka við starfi þegar fyrirsjáanlegt er að hann muni oft verða vanhæfur til meðferðar einstakra mála á grundvelli hinna sérstöku hæfisreglna.

Eftirtalin störf eru ósamrýmanleg störfum löggilts vigtarmanns sem starfar sem hafnarvigtarmaður í aðal- eða aukastarfi:

1. Eigandi og/eða útgerðarmaður fiskiskipa.
2. Starfsmaður útgerðar fiskiskipa.
3. Eigandi fiskvinnslu.
4. Starfsmaður fiskvinnslu.
5. Eigandi fiskmarkaðar.
6. Starfsmaður fiskmarkaðar.

[Þrátt fyrir ákvæði 2. mgr. er Neytendastofu heimilt að beiðni hlutaðeigandi hafnarstjórnar og að fenginni umsögn Fiskistofu að veita aðila undanþágu, til 18 mánaða í senn, til hafnarvigtunar. Skilyrði til veitingar undanþágu samkvæmt þessari grein eru:

- a. að fámenni í viðkomandi byggðarlagi valdi því að örðugt er að fá til starfa löggiltan vigtarmann sem uppfyllir öll skilyrði 2. mgr.
- b. að sveitarfélag sýni fram á að leitað hafi verið eftir aðila til starfa sem uppfyllir öll skilyrði 2. mgr.

Auk þessa skal sveitarstjórn gera grein fyrir því hvernig brugðist verði við er hafnarvigtarmaður er vanhæfur til vigtunar, sbr. ákvæði 5. gr.]<sup>1)</sup>

<sup>1)</sup> Auglýsing nr. 20/2008, 1. gr.

\* Sé munur á texta samsettra reglna og reglna eins og þær eru birtar í Stjórnartíðindum gildir texti Stjórnartíðinda.

4. gr.

*Eignaraðild.*

Löggiltur vigtarmaður telst vanhæfur ef hann á eignaraðild að fyrirtæki þar sem vigtun fer fram ef hlutafé hans nemur 5% eða meira. Minniháttar hlutafjäreign í almenningshlutafélagi telst ekki eignaraðild í þessu sambandi.

Eigi er þó um vanhæfi að ræða ef vigtarmaður er starfsmaður fyrirtækis þar sem vigtun fer fram, enda eigi hann ekki eignaraðild að rekstrinum og upplýsir viðskiptamann um tengslin, sbr. f-lið 25. gr. laga nr. 91/2006 um mælingar, mæligrunna og vigtarmenn.

Þrátt fyrir ákvæði 1. mgr. telst vigtarmaður ekki vanhæfur þegar um er að ræða vigtun hjá sjálfstætt starfandi lögaðila, sem telst vera þriðji aðili að viðskiptunum, þar sem engin eignatengsl eru á milli vigtunaraðila og viðskiptamanna hans.

5. gr.

*Sérstök hæfisskilyrði.*

Löggiltur vigtarmaður telst vanhæfur:

- a. ef hann er aðili að viðskiptum með þá vöru sem vigtuð er, fyrirsvarsmáður eða umboðsmáður aðila;
- b. ef hann er eða hefur verið maki aðila að viðskiptum með þá vöru sem vigtuð er, skyldur eða mægður aðila í beinan legg eða að öðrum lið til hliðar eða tengdur aðila með sama hætti vegna ættleiðingar;
- c. ef hann tengist fyrirsvarsmanni eða umboðsmanni aðila að viðskiptum með þá vöru sem vigtuð er með þeim hætti sem segir í b-lið;
- d. ef að öðru leyti eru fyrir hendi þær aðstæður sem eru fallnar til þess að draga óhlutdrægni hans í efa með réttu.

6. gr.

*Áhrif vanhæfis.*

Löggiltur vigtarmaður, sem veit um ástæður er kunna að valda vanhæfi hans, skal án tafar lýsa sig vanhæfan og neita vigtun.

7. gr.

*Gildistaka.*

Reglur þessar eru settar á grundvelli 2. mgr. 27. gr. laga nr. 91/2006 um mælingar, mæligrunna og vigtarmenn og öðlast þær þegar gildi.